

# Մաշտոցի Արձագանգ

Հայաստանեայց Եկեղեցույ Սուրբ Յակոբ Կիրակնօրեայ Դպրոցի ամսաթերթ

## Այս թիւով...

Խմբագրական՝

Առաւելագոյնէն մէկ աստիճան անդին... Էջ 2

«Երկնաւոր Գահատակ եւ կոյսեր իմաստուն ... » Մայիս 19-20: Էջ 3

Ինչո՞ւ հայեր խաչը կը համբուրեն միշտ: Էջ 3

Հոգեգալուստ կամ Սուրբ Հոգիի գալստեան տօն՝ Մայիս 11: Էջ 4

Յիսուսի համբարձումը: Էջ 5

Եկեղեցական բառարան: Էջ 6

Խօսքն Աստուծոյ: Էջ 7

Աստուածաշունչը մանուկներու համար. Յիսուս կը քալէ ջուրին վրայէն: Էջ 8-9-10

Եզակի գիրեր: Էջ 11

Ո՞րն է ճիշդ պատասխանը: Էջ 12-13-14-15

Կարճ լուրեր կիրակնօրեայէն: Էջ 16

Մայիս 2008

ԺԵ տարի- թիւ 9



Հաստատ կեցիր քու սորված բաներուդ վրայ, որոնց ճշմարտութեան վստահ ես:

Բ. Տիմոթէոսի 3.14

Խմբագրական

Առաւելագոյնէն մէկ աստիճան անդին . . .

Մարդ արարածին ծանրաբեռնուած եւ երբեմն բնականէն աւելի լեցուն առօրեան մշտական փորձի մը կարելի է նմանցնել, փորձ մը որուն ընթացքին անհատը կը կանչուի չափելու եւ կշռելու ինքն իր անհատական զանազան տեսակի սահմանները: Այսպիսով, առօրեայի ընթացքին, փորձի կ'ենթարկուին մեր համբերութեան սահմանները, մեր դիմադրականութիւնը, մեր նեղութիւններու դէմ դնելու կարողութեան տարողութիւնը, մեր տարբերութիւններ ընդունելու կարողութիւնը, եւայլն:

Մեզմէ իւրաքանչիւրը ունի իրեն յատուկ սահմաններ որոնք կու գան ուրուագծելու մեր ամէնօրեայ գործունէութեան, մտածելակերպի եւ գոյութեան ոճը: Թէեւ մեզմէ իւրաքանչիւրին սահմանները տարբեր են, բոլորս ալ կ'ընդունինք թէ անպատճառ եւ անխուսափելիօրէն ունինք, անխտիր, մեր սահմանները: Երբ կացութիւն մը մեզ կը դնէ դէմ առ դէմ մեր անձնական սահմաններէն մէկուն հետ, մենք կանք կ'առնենք, մեր գործը, ճիգը, կացութիւնը կը դադրեցնենք ու պատճարաբանելով թէ «ասկէ աւելին չենք կրնար», կը կենանք ճիշդ հոն, մեր սահմանին առջեւ:

Ընդունելով մէկտեղ իբրեւ մարդ արարածներ մեր սահմանաբակուած ըլլալը, մեզի այնպէս կը թուի թէ Աստուած մեզ կարծես պարգեւած է նոյն ատեն, մեր մարդկային սահմանները ամէն անգամ մէկ փոքր չափով անդին հրելու եւ մէկ փոքր չափ աւելին ընելու զոյգ շնորհներով:

Մայիս ամսուան ընթացքին յիշատակուող Մայրերու օրը, առանց միակը ըլլալու, վերոյիշեալ իրողութիւնը լաւապէս մարմնացնող օրինակ մըն է: Այսպէս, մայր մը իր բազմաթիւ պարտականութիւնները եւ պատասխանատուութիւնները ամբողջացնելու ընթացքին շատ յաճախ կը հասնի իր մարդկային սահմաններուն ճի'շդ առջեւ, բայց կարծես մղուած աստուածատուր յատուկ շնորհով մը, մի'շտ ալ կը յաջողի մէկ չափ աւելին ընել, մէկ անգամ ե'ւս համբերել, մէկ անգամ ե'ւս դիմանալ: Ոչ միայն մայրերը, անշուշտ, բայց մայրերը յատկապէս:

Մարդկային սահմանները գերազանցելու բարի փորձերը մեզմէ իւրաքանչիւրին տրամադրութեան տակ կը գտնուին: Մեզմէ իւրաքանչիւրին կը մնայ գիտակցիլ թէ Աստուած մեզ ստեղծած է բարին գործելու եւ խորհելու համար եւ կեանքի այս երկու ուղեգիծները իրականացնելու համար բոլորս ալ փորձելու ենք, օրինակ առնելով մայրերէն, մի'շտ մեր լաւագոյնէն մէկ չափ աւելին տալ, մեր առաւելագոյնէն մէկ չափ անդի'ն թեւակոխել:

«Մաշտոցի Արձագանգ»  
Հայաստանեայց Եկեղեցւոյ Սուրբ Յակոբ Կիրակնօրեայ Դպրոցի ամսաթերթ:  
Խմբագիր՝ Շողիկ Թորիկեան-Պոյաճեան  
  
Հայաստանեայց Եկեղեցւոյ Սուրբ Յակոբ Կիրակնօրեայ Դպրոցի կամաւոր խմբակը  
Ուսուցիչներ՝ Վէրժին Գիւլթանեան, Թամար Գիւլիբեան, Յասմիկ Նաճարեան, Գարոլ Մանուկեան, Շողիկ Նաճարեան, Յասմիկ Գանաճեան:  
Տնօրէն՝ Թորոս Պապիկեան

« Երկնաւոր նահատակ  
եւ կոյսեր իմաստուն . . . »  
Մայիս 19-20

Մեզմէ ով ծանօթ չէ Հռիփսիմեանց ու Գայանեայց կոյսերու նահատակութեան պատմութեան: Անոնք իրենց նահատակութեան շնորհիւ դարձած են քրիստոնէական հաւատքի վկայութիւններն ու տօնելի նահատակները:

Հռիփսիմեանց կոյսերը առաքինազարդ վանական կեանք կը վարէին Հռոմի մէջ, իրենց հոգեւոր մայրապետ Գայիանէ կոյսի առաջնորդութեամբ: Խուսաբելով հռոմէացի Դիոկղետիանոս կայսրի հալածանքներէն եկած ու հաստատուած են Հայաստան, Վաղարշապատի Հնձանք կոչուած վայրը: Սակայն հոն ալ հալածանքի ենթարկուելով, այս անգամ օրին տակաւին կռապաշտ Տրդատ թագաւորի հրամանով ու անոր իսկ հրահանգով՝ նահատակուած:

Կ'ըսուի թէ սրբուհիներու մահէն 9 օր վերջ Գրիգոր Լուսաւորիչ դուրս եկաւ խոր Վիրապէն ու ինք ամփոփել տուաւ անոնց մարմինները: Անոնց յիշատակին է որ կառուցուած են Էջմիածնի Սուրբ Հռիփսիմէ եւ Սուրբ Գայիանէ վանքերը:



**Հայաստանեայց եկեղեցին  
հարցումներով, պատասխաններով**

Ինչո՞ւ հայեր խաչը կը համբուրեն միշտ:

Հայ քրիստոնէաներ կը մեծարեն Սուրբ Խաչը, որովհետեւ անով մեր փրկութիւնը իրագործուեցաւ: Պօղոս Առաքեալ կը գրէ.- « Գալով ինձի, քա՛ն լիցի որ մեր Տիրոջ Յիսուս Քրիստոսի խաչէն զատ ուրիշ բանով պարծենամ...»

Քրիստոսով խաչը դարձաւ զոհողութեան եւ փրկագործութեան խորհրդանիշ: Հայ եկեղեցու սուրբ Խաչի նուիրուած շարականները այնքան գեղեցկօրէն կը բանաձեւեն այս ճշմարտութիւնը, որ Հայ հաւատացեալը իր սէրն ու երկիրաւորութիւնը ֆիզիքապէս եւ զուգորդելով անոր՝ կը համբուրէ խաչը:

## Հոգեգալուստ Կամ Սուրբ Հոգիի գալստեան տօն Մայիս 11


«Բայց Միսիթարիչը՝ Սուրբ Հոգին, որ հայրս ձեզի պիտի դրկէ իմ անունովս, անհկա ձեզի ամէն ինչ պիտի սորվեցնէ եւ յիշեցնէ ինչ որ ես ձեզի ըսի:»

Այսպէս կը խոստանար Քրիստոս իր աշակերտներուն վերջին ընթրիքի ընթացքին: Ըստ Առաքեալներու գործերը գիրքին, այս «գալուստը» իրականացած է Քրիստոսի յարութենէն յիսուն օր վերջ: Նշա՞նք. «Բոլոր ներկաները Սուրբ Հոգիով լեցուեցան եւ սկսան տարբեր լեզուներով խօսիլ, ինչպէս որ Հոգին խօսիլ կու տար:»

Հոգեգալստեան տօնը կը գուգադիպի հրեաներուն Պենտէկոստէ տօնին հետ, որ յունարէնով կը նշանակէ «յիսուն օր»: Իրապէս ալ հրեաները, իրե՛նք եւս, Սուրբ Զատիկէն յիսուն օր վերջ տասնաբանեայ օրէնքներու ստացման առթիւ յատուկ յիշատակութեան օր ունին՝ Պենտէկոստէն:

Հոգեգալստեան ամենէն աւելի իւրայատուկ դէպքը լեզուափոխութիւնն է, կամ Քրիստոսի աշակերտներուն տարբեր տարբեր լեզուներ խօսելու կարողութիւնը: Աւետարանը այսպիսի լեզուափոխութեան երկու դրուագներ կը պարունակէ:

Առաջինը Հին Կտակարանին մէջ երբ Բաբելոնի աշտարակի շինութեան ընթացքին գործաւորներու լեզուները կը խառնուին ու անոնք այլեւս զիրար չեն հասկնար: Երկրորդ դրուագը Նոր Կտակարանին մէջ յիշատակուող, երբ մարդիկ կը սկսին տարբեր տարբեր լեզուներ խօսիլ բայց բոլորն ալ կը վկայեն Աստուծոյ մեծագործութիւններուն մասին:



**«Հոգեգալուստ»  
Մանրանկար 13-րդ դարի  
կէսին Կիլիկիոյ մէջ  
ընդօրինակուած «Սմբատ  
Սպարապետի Աւետարան»  
էն**

### Յիսուսի համբարձումը

*«Ապա տարաւ զանոնք մինչեւ Բեթանիա եւ ձեռքերը վեր բարձրացնելով՝ օրհնեց զանոնք: Եւ մինչ կ'օրհնէր, բաժնուեցաւ անոնցմէ, դէպի երկինք բարձրանալով: Անոնք երկրպագեցին Յիսուսի եւ մեծ ուրախութեամբ վերադարձան Երուսաղէմ: Ամէն օր տաճարին մէջ էին գովելով ու օրհնաբանելով զԱստուած:»*

Ահա թէ ինչ ձեւով կը պատմուի Յիսուսի համբարձման դրուագը Ղուկասի աւետարանի վերջին տողերուն մէջ:

Համբարձում կը նշանակէ «բարձրացում»: Համբարձումը Յիսուսի յարութիւն առած ու փառաւորուած մարմնով երկինք բարձրանալու եւ Հայր Աստուծոյ աջ կողմը բազմելու յիշատակման տօնն է, որ կը զուգադիպի Սուրբ Յարութեան կամ Զատիկէն քառասուն օր վերջ, Հինգշաբթի օրով: Հայաստանեայց եկեղեցոյ եւ հայ ժողովուրդի կողմէ ամենէն աւելի ուրախ տօներէն մէկը կը նկատուի այս որովհետեւ անով Յիսուս անգամ մը եւս կը հաստատէր յաիտենական կեանքի գոյութիւնը ու կը համբարձար, կը բարձրանար երկնաւոր հօր մօտ բարեխօսելու մարդկութեան համար:

Յարութենէն ետք, Յիսուս քառասուն օրերու ընթացքին կը յայտնուի Իր աշակերտներուն, վերստին կը հաստատէ Իր յարութիւն առած ըլլալը ու կը խօսի անոնց երկնքի արքայութեան մասին ու կ'ուսուցանէ թէ ինչպէս պէտք է քարոզեն Աւետարանը: Քառասուներորդ օրը Տէրը կը աշակերտներուն հետ կը բարձրանայ, անգամ մը եւս, ձիթենեաց լերան գագաթը ու կը յայտնէ անոնց թէ «երբ Սուրբ Հոգին իջնէ ձեր վրայ, զօրութեամբ պիտի լեցուիք եւ իմ վկաներս պիտի ըլլաք, Երուսաղէմի, Հրէաստանի եւ Սամարիային մէջ, եւ մինչեւ աշխարհի ծայրամասերը»: Երբ ան այս խօսքերը կ'արտասանէր, աշակերտները ապշահար կը նային թէ ինչպէս Յիսուս երկինք կը բարձրանայ մինչեւ որ ամպերը կը ծածկեն զինք աշակերտներու տեսողութենէն:


Համբարձման օրով Քրիստոսի տուած այս պատուիրանին համաձայն է ահա, որ անոր առաքելներէն երկուքը՝ Թադէոսն ու Բարթողիմէոսը կու գան Հայաստան քարոզելու եւ հոն հիմնելու մեր Առաքելական Սուրբ Եկեղեցին:



**«Համբարձում»  
Մանրանկար 1287-ի  
Կիլիկիոյ «Ակներ»  
պատկերազարդուած  
Աւետարանէն**

## Աղօթք յաջողութենէ մը ետք

Բարերար Աստուած, միայն դո՛ւն ես որ զիս քու բարիքներովդ կ’ողողես: Կ’օրհնաբանեմ քեզ եւ շնորհակալութիւն կը յայտնեմ այն բոլոր բարիքներուն համար որ առատօրէն անարժանիս կը պարգեւես քու սիրոյ գանձերէդ: Կը փառաւորեմ քեզ եւ ամբողջ սրտովս գոհութիւն կը յայտնեմ, միշտ եւ ամէն բանի համար, եւ ամէն բանէ աւելի կը խնդրեմ որ, քու արքայութիւնդ, արդարութիւն եւ իմաստութիւն շնորհես ինձի, որպէսզի կարենամ լաւապէս մատակարարել ձրիօրէն քու տուած պարգեւներդ կանուխէն խորհելով եւ պատրաստուելով ապագայ ձախորդութեանց, եւ ըստ այնմ յօժարակամ ուրախութեամբ կարօտեալներուն տամ ինչ որ պէտք է իրենց, ինչպէս դուն կը բաւարարես իմ բոլոր պէտքերս:



Միշտ քու երկիւղիդ, սուրբ օրէնքիդ եւ արդարութեանդ մէջ պահէ զիս, որպէսզի չըլլայ որ հպարտանամ եւ անհաւատ դառնամ այս անցաւոր հարստութիւններով, որովհետեւ այս կեանքի մէջ չկայ կայուն բան եւ վիճակ, եւ չե՛մ գիտեր թէ վաղը ինձի ի՞նչ կը բերէ: Հետեւաբար կ’աղաչե՛մ, քու բարի պարգեւներովդ հետ միասին, նաեւ խոնարհ, հեզ եւ գթասիրտ հոգի մը տուր ինձի, որպէսզի քու կամքիդ եւ սուրբ օրէնքիդ համաձայն ապրիմ, եւ նոյնիսկ երբ ձախորդութեան եւ չքաւորութեան, վիշտերու եւ տագնապներու մատնուիմ, կարենամ տոկալ եւ կրել քաջութեամբ, անտրտունջ եւ գոհունակ սրտով, միշտ շնորհակալութիւն յայտնելով քու սուրբ կամքիդ համար. որովհետեւ քեզմէ՛ է ամէն բան, եւ դո՛ւն է որ կը հատուցանես, մեր գործերուն եւ մտածողութեան համաձայն: Քեզի փառք յաիտեանս: Ամէն:

### Խոնարհութիւն խնդրելու աղօթք

Սորվեցո՛ւր մեզի, ով Տէր, որ տեսնենք եւ օգտագործենք ծառայութեան ամէն պատեհութիւն. տանք՝ առանց փոխարժէքը հաշուելու, պայքարինք՝ առանց վիրաւորելու, աշխատինք՝ առանց հանգիստ փնտռելու, ծառայենք՝ առանց վարձատրութիւն ակնկալելու. այն գիտակցութեամբ՝ թէ քու կա՛մքդ է որ կը կատարենք: Ամէն:

*Ս. Բարսեղ Կեսարացի*

## Խօսքն Աստուծոյ

### Մի՛ վատնէք Աստուծմէ ձեր ստացած շնորհքը...

*Բ. Կորնթացիներուն 6.1-10*

Արդ, որովհետեւ Աստուծոյ գործակիցներն ենք, կ'աղաչենք ձեզի, մի՛ վատնէք Աստուծմէ ձեր ստացած շնորհքը: Որովհետեւ Աստուած կ'ըսէ. -

«Երբ յարմար ժամանակը եկաւ՝ լսեցի քեզ,  
երբ փրկութեան օրը հասաւ, օգնեցի քեզի»:

Ահա հիմա՛ է այդ յարմար ժամանակը. հիմա՛ է փրկութեան օրը:

Ոեւէ բանով պատճառ մի՛ ըլլաք որ Աստուծոյ գործը խափանուի կամ վարկաբեկուի. այլ՝ բոլոր պարագաներուն ալ դուք ձեզ ցոյց տուէք որպէս Աստուծոյ պաշտօնեաներ, մեծ համբերութեամբ յանձն առնելով նեղութիւնը, վիշտը, չարչարանքը, ծեծը, բանտը, խոտարարներու վայրագութիւնները, յոգնութիւնը, անքնութիւնը, անօթութիւնը: Այս բոլորը տարէք՝ մաքուր սրտով, գիտակցօրէն, համբերատարութեամբ, քաղցրութեամբ, Սուրբ Հոգիով, անկեղծ սիրով, ճշմարտութիւնը քարոզելով, Աստուծոյ զօրութեամբ եւ արդարութեամբ զինուած՝, չարին դէմ յարձակելու եւ ինքզինք պաշտպանելու համար: Մի՛ ալլալիք՝ ո՛չ փառքէն եւ ո՛չ անարգանքէն, ո՛չ գովասանքէն եւ ո՛չ մեղադրանքէն:

Մարդիկ մոլորած թող ըսեն մեզի.

մենք գիտենք թէ ճշմարտութենէն չենք շեղած:

Թող չուզեն մեզ ճանչնալ.

մենք գիտենք թէ մեզ լաւ կը ճանչնան:

Թող մեզ պատժապարտ համարեն.

մենք գիտենք թէ մահուան դատապարտութենէն ազատած ենք:

Թող մեր կեանքը տխուր կարծեն.

մենք միշտ ուրախ ենք:

Աղքատ թող սեպեն.

մենք շատերու կեանքերը կը ճոխացնենք:

Այո՛, կը թուի թէ ոչինչ ունինք,

մինչդեռ ամէն ինչ ունինք:

# Աստուածաշունչը մանուկներու համար Յիսուս կը քալէ ջուրին վրայէն

Յիսուս 5000 մարդ կերակրեց հինգ հացով եւ երկու ձուկով:  
Այնչափ ժողովուրդ կար շուրջը, որ ան ստիպեց աշակերտներուն որ անմիջապէս նաւակ ելլեն եւ լիճին միւս կողմը անցնելով զինք հոն սպասեն:

Լիճին վրայ աշակերտները մեծ փոթորիկի մը հանդիպեցան եւ զօրաւոր հովերուն դէմ նաւարկելու դժուարութիւն ունեցան:

Այս տեսնելով Յիսուս ջուրին վրայէն քալելով անոնց քով գնաց:



Երբ աշակերտները ջուրին վրայէն քալող շուքը տեսան, կարծեցին որ ուրուական մըն էր եւ շատ վախցան: Սակայն Յիսուս անմիջապէս խօսեցաւ եւ ըսաւ՝ «Քաջ եղէք, ես եմ, մի վախնաք»:



Պետրոս ըսաւ՝ «Տէր, եթէ դուն ես՝ հրամայէ որ ջուրին վրայէն քալելով քովդ գամ:»



Յիսուս ըսաւ «Եկուր»: Պետրոս նաւակէն իջաւ եւ ջուրերուն վրայէն քալելով սկսաւ երթալ դէպի Յիսուս: Բայց տեսնելով հովին սաստկութիւնը՝ վախցաւ ու բարձր ալիքներուն սկսաւ նայիլ վախով: Ան հազիւ գլուխը դարձուցած էր եւ



ալ չէր նայէր Յիսուսի  
սկսաւ ընկղմիլ ու  
պռռաց՝  
«Տէր ազատէ զիս»:  
Յիսուս անմիջապէս  
ձեռքը երկարեց, զինք  
բռնեց ու ըսաւ  
«Թերահաւատ, ինչո՞ւ  
կասկածեցար»:

Այն ատեն հովը  
դադրեցաւ, նաւակի մէջ  
գտնուող աշակերտները  
երկրպագեցին Յիսուսի  
եւ ըսին «Իսկապէս որ  
դուն Աստուծոյ Որդին  
ես»:



**Եզակի գիրեր**  
Հայերեն գիրերով Sudoku

գ	ա	բ	է	դ	թ	ը	զ	ե
դ	ը	զ	ե	գ	բ	թ	է	ա
է	ե	թ	ը	զ	ա	դ	բ	գ
բ	է	ե	գ	թ	զ	ա	ը	դ
ա	զ	ը	բ	ե	դ	գ	թ	է
թ	գ	դ	ա	ը	է	զ	ե	բ
ը	թ	ա	դ	է	ե	բ	զ	գ
ե	դ	գ	զ	բ	ը	է	ա	թ
զ	բ	է	թ	ա	գ	ե	դ	ը

ա	գ		է		թ			
դ			ե	բ	ը	ա		
ե	ը					դ	է	թ
թ		ը						
	դ		գ		զ		ը	
						բ		զ
ը	ա	է					բ	դ
		ե	դ	ը	բ			ա
			զ		ա		թ	ը

Նախորդ «Եզակի գիրեր» ուն  
լուծումը

Ամբողջացուր քառակուսիները գործածելով ա, բ, գ, դ, ե, զ, է, ը, թ գիրերը պայմանաւ որ միայն մէկ անգամ գործածես իւրաքանչիւր գիր իւրաքանչիւր՝

- հորիզոնական գիծի վրայ,
- ուղղահայեաց գիծի վրայ եւ
- ինեակ քառակուսիի մէջ

**Ո՞րն է ճիշդ պատասխանը**

**Ապրիլ ամսուան պատասխանները**

Մանկապարտէզի անկիւն

1. Բեթանիա, օրհնեց, բաժնուեցաւ, երկինք, երկրպագեցին, Երուսաղէմ, զԱստուած
- Նախակրթարան Ա. Բ. Գ.անկիւն
1. ա. Կարմիր Կիրակի
2. բ. Բ. Ծաղկազարդ
3. դ. 40
4. ա. Հինգշաբթի
5. բ. Մեր մեղքերը խոստովանինք եւ ծով պահենք
6. բ. Երեւումն Սուրբ Խաչի
7. գ. Քրիստոս ի մէջ մեր
8. Ի մէջ մեր յայտնեցաւ
9. յայտնութիւնը Քրիստոսի
10. Կիրակի, Կանաչ, Կարմիր, Երեւումն

Նախակրթարան Դ. Ե. Զ.անկիւն

1. օր
2. Կրկնազատիկ կամ Նոր Կիրակի
3. 40
4. Հինգշաբթի
5. Նշխարով եւ անապակ գինիով

6. 93
  7. ա. Սիմոն Կիրենացի
  8. բ. Յովսէփ Արիմաթեացի
  9. գ. Բարաբաս
  10. Պօղոս
- Երկրորդականի անկիւն
1. բ. Կորնթացիներուն Ա. 13
  2. դ. Տիտոս
  3. բ. Պօղոս
  4. բ. Պօղոս
  5. գ. 7
  6. ա. Յակոբոս եւ Յուդա
  7. դ. 4
  8. դ. 4
  9. ա. Յակոբոս 2.17
  10. բ. Պօղոս

# Ո՞րն է ճիշդ պատասխանը Մանկապարտեզի անկիւն



Ամբողջացո՛ւր ըստ Ղուկաս 10.27 ին  
 սրտովդ, մտքովդ, հոգիովդ, զօրութեամբդ, քու անձիդ  
 պէս

Սիրէ՛ քու Տէր Աստուածդ ամբողջ -----, ամբողջ  
 -----, ամբողջ ----- եւ ամբողջ  
 ----- եւ Սիրէ՛ ընկերդ  
 ----- :

**Ո՞րն է ճիշդ պատասխանը**

Նախակրթարան Ա. Բ. եւ Գ. դասարաններու անկիւն

Անուն: \_\_\_\_\_

1. Յարութենէն ետք Յիսուս քանի՞ օր աշակերտներուն հետ մնաց:

- ա.- 3 օր
- բ.- 40 օր
- գ.- 50 օր
- դ.- 30 օր

2.- Յիսուսի ո՞ր աշակերտը Յիսուսի յարութեան չհաւատաց:

- ա.- Պետրոս
- բ.- Յովհաննէս
- գ.- Թովմաս
- դ.- Յակոբոս

3.- Յիսուսի խաչելութեան ընթացքին, իր աշակերտներէն ո՞վ ներկայ էր:

- ա.- Յովհաննէս
- բ.- Յուդա
- գ.- Մատթէոս
- դ.- Թովմաս

4.- Ո՞ր օրն էր առաջին Սուրբ Հաղորդութեան օրը:

- ա.- Յիսուսի ծով ու հացը շաւոցուցած օրը:
- բ.- Հրաշալի ձկնորսութեան օրը:
- գ.- Վերջին ընթրիքին օրը:
- դ.- Յարութիւնէն ետք Յիսուսի աշակերտներուն երեւցած օրը:

5.- Ե՞րբ Սուրբ Հոգին կրակէ լեզուներու նման եկաւ եւ հանգչեցաւ Յիսուսի աշակերտներու վրայ:

- ա.- Յիսուսի յարութեան օրը:
- բ.- Յիսուսի խաչելութեան ընթացքին:
- գ.- Պենտէկոստէի տօնին:
- դ.- Յիսուսի Համբարձման օրը:

6. Պենտէկոստէ «Pentecost» ո՞ր թիւին կը համապատասխանէ:

- ա.- 5
- բ.- 40
- գ.- 50
- դ.- 30

7.- Պենտէկոստէ Հայերէնով ո՞ր տօնին կը համապատասխանէ զոր այս տարի Մայիս 11 ին տօնեցինք:

Հ-----

8.- Հոգեգալուստին յաջորդող Կիրակին Հին Կտակարանի ո՞ր մարգարէին տօնն է:

- ա.- Յովհաննէս
- բ.- Եղիսէ
- գ.- Մատթէոս
- դ.- Եղիա

9.- Սուրբ Գրիգոր Լուսաւորիչի Ելն ի Վիրապի տօնը շաբթուան ո՞ր օրը կը զուգահիսի:

- ա.- Հինգշաբթի
- բ.- Ուրբաթ
- գ.- Ծաբաթ
- դ.- Կիրակի

10.- Սուրբ Գրիգոր Լուսաւորիչի Ելն ի Վիրապին յաջորդող օրը ի՞նչ տօն է:

Կաթուղիկէ Սուրբ Է-----

### Ո՞րն է ճիշդ պատասխանը

Նախակրթարան Դ. Ե. եւ Զ. դասարաններու անկիւն

1. Երկրորդ Ծաղկազարդը Համբարձումի յաջորդող Կիրակին է: Այս տարի ե՞րբ էր Երկրորդ Ծաղկազարդը:

-----  
-----

2. Ո՞րն է շիտակ շարքը հետեւեալ Կիրակիներուն:

- ա.- Երկրորդ Ծաղկազարդ, Հոգեգալուստ, Յիշատակ Եղիա մարգարէին, Տօն Ա. Էջմիածնի
- բ.- Երկրորդ Ծաղկազարդ, Տօն Ա. Էջմիածնի, Հոգեգալուստ, Յիշատակ Եղիա մարգարէին
- գ.- Երկրորդ Ծաղկազարդ, Յիշատակ Եղիա մարգարէին, Տօն Ա. Էջմիածնի, Հոգեգալուստ
- դ.- Հոգեգալուստ, Երկրորդ Ծաղկազարդ, Տօն Ա. Էջմիածնի, Յիշատակ Եղիա մարգարէին

3. Ա. Էջմիածնի տօնին նախորդող Երկուշաբթին տօնն է:

-----

4. Ա. Էջմիածնի տօնին նախորդող Երեքշաբթին տօնն է:

-----

5.- Նոր Կտակարանի 27 գիրքերէն որ գիրքին մէջ կը կարդանք Հոգեգալուստին մասին:

-----

6. Սուրբ Հոգին ի՞նչ ձեւով հանգչեցաւ առաքեալներուն վրայ:

-----

7. Առաքեալները ի՞նչպէս որոշեցին թէ ո՞վ պիտի փոխարինէ Յուդան:

Աղօթեցին եւ  
-----  
ձգեցին:

8. Ո՞վ փոխարինեց Յուդան:

- ա. Մատաթիա
- բ. Բարսաբա
- գ. Յովսէփ
- դ. Արդար

9. Այս տարի երբ է Սուրբ Գրիգոր Լուսաւորիչ Ելն ի Վիրապէն տօնին յիշատակը:

-----

10. Ի՞նչ տօն է Սուրբ Գրիգոր Լուսաւորիչի Ելն ի Վիրապին յաջորդող Օրը:

-----

Ո՞րն է ճիշդ պատասխանը  
Երկրորդականի անկիւն

1- Յիսուս իր յարութենէն քանի՞  
օր ետք համբարձաւ:  
- ----- օր

2- Հոգեգալուստը՝ կամ  
Պենտէկոստէն Յիսուսի յարութենէն  
քանի՞ օր ետք տեղի ունեցաւ:  
----- օր

3. Աստուածաշունչի ո՞ր գիրքին մէջ  
կը կարդանք Հոգեգալուստին  
մասին:  
-----

4. Առաքեալներու Գործերը գիրքին  
Ա. գլուխին մէջ կը կարդանք թէ  
Առաքեալները փոխարիներէն  
Յուդան : Որո՞ւ հետ:  
ա. Մատաթիա  
բ. Բարսաբա

5. Առաքեալները ի՞նչ միջոց  
գործածեցին հաւատացեալներուն  
կողմէ երկու ներկայացուած անձերէն  
մէկը զատելու:  
-----  
-----

6. Չորս Աւետարաններէն ո՞ր  
երկուքին մէջ կը կարդանք Յիսուսի  
համբարձումին մասին:  
-----  
-----

7. Հետեւեալ գիրքերէն ո՞ր մէկուն  
մէջ կը կարդանք Հոգեգալուստի  
մասին:  
ա- Մատթէոս  
բ- Մարկոս  
գ- Ղուկաս  
դ- Առաքեալներուն Գործերը

8. Ո՞վ գրած է Առաքեալներուն  
Գործերը գիրքը:  
ա- Մատթէոս  
բ- Մարկոս  
գ- Ղուկաս  
դ- Յովհաննէս

9. Այս տարի ո՞ր տօնը կը տօնենք  
Մայիս 25 ին:  
-----  
-----

10. Հին կտակարանի ո՞ր դէպքը  
մաս կը կազմէ Հայաստանի  
Հանրապետութեան զինանշանին:  
-----  
-----

# Մայիս Ամսուան Տօնացոյց

- 1: Հինգշաբթի՝ Տօն Համբաձման Քրիստոսի
- 4: Կիրակի՝ Բ. Ծաղկազարդ
- 11: Կիրակի՝ Հոգեգալուստ
- 18: Կիրակի՝ Յիշատակ Եղիա Մարգարէին
- 19: Երկուշաբթի՝ Ս. Հռիփսիմեանց Կոյսեր
- 20: Երեքշաբթի՝ Ս. Գայիանեանց Կոյսեր
- 24: Ծաբաթ՝ Ս. Գրիգոր Լուսաւորիչ Ելն ի Վիրապ
- 25: Կիրակի՝ Տօն Կաթուղիկէ Սուրբ Էջմիածնի
- 28: Չորեքշաբթի՝ Հայաստանի Ա. Հանրապետութեան 90րդ Տարեդարձ
- 31: Ծաբաթ՝ Մեծն Ներսէս Հայրապետ

## Կարճ լուրեր Կիրակնօրեայէն

Կիրակնօրեայ Դպրոցի

## Ամապերջի Հանդէսը

տեղի կ'ունենայ

Կիրակի **8** Յունիս կ.ե. ժամը

**1:30** ին

Բասդրմաճեան Սրահին մէջ

Մուտքը Ազատ

Ներկայս ընդունիլ իբրեւ

անձնական հրաւեր

«ՄԱՇՏՈՅԻ ԱՐՁԱԳԱՆԳ»ի

Գերկայ եւ Գախկին թիւերը կը գտնուին Գաւել համացանցի վրայ:

Այցելեցէ՛ք

[www.sourphagop.org/mashdots](http://www.sourphagop.org/mashdots)